

Landesbibliothek Oldenburg

Digitalisierung von Drucken

**Sebastiani Castellionis Sacrorvm Dialogorum Libri
Qvatvor, Qvos Postremo Ipse Recognovit: Argvmenta
Singvlis Dialogis Praeposvit, Et Sententias Svbiecit ...**

Châteillon, Sébastien

Francofurti, 1761

VD18 12886300

Centvrio.

urn:nbn:de:gbv:45:1-18303

SENTENTIA.

Christus venit ad docendum servandumque fontes. Christus æternum vivificumque cibum potionemque dat. Deus animo & vere adorandus est, nullo locorum discrimine. Dei voluntatem exequi, cibus esse debet homini Christiano.

CENTVRIO. Matth. 8.

ARGVMENTVM.

Jesus a Centurione exoratus, ejus puerum membris captum verbo sanat.

Centurio, Jesus.

Domine, puer meus jacet domi membris captus, graviterque cruciatur. *J.* Ego ibo eum curatum. *C.* a) At ego non sum dignus, cujus tu tectum subeas: sed tantum jube verbo, & sanabitur. Nam ego quoque, qui sub alterius sum potestate, tamen obtineo autoritatem in eos, quibus præsum, milites: ac si quem jubeo ire, ita si venire, venit: si servum facere quid, facit. *J.* O rem admiratione dignissimam! Credite mihi, ne in Israelitis quidem tantam fiduciam inveni. Et sine dubio multi ab oriente atque occidente profecti, accumbent cum Abrahamo, Isaaco & Jacobo in regno cœlesti: cum interea b) ii, ad quos regnum pertinebat, in alta noctis caligine demersi, nihil aliud quam flebunt & frendebunt. Tu abi, & ut confidisti, sic obtineto.

SENTEN-

a) Magna modestia.

b) Israelitæ.

SENTENTIA.

Christus tam facile morbis imperat, quam dux militibus. Primi erunt ultimi, & ultimi primi.

PISCATORES. Luc. 5.

ARGUMENTVM.

Petrus jacto reti jussu Jesu plurimos pisces capit.

Jesus, Petrus.

Subduc in altum oriam, Petre, ut retia laxetis ad prædam. P. Præceptor, totam noctem laborantes nihil cepimus: Sed tamen postquam ita jubes, demergam rete. O rem miram! Adeste socii, adjuvate nos. Rumpitur rete, ita multis piscibus est plenum. Corripe tu istas plagas altrinsecus, vos, vos invergite in naviculam. Desinite, desinite sustinere rete: jam hæc plena est, infundamus in alteram. O rem inauditam! pene submerguntur cymbæ, præ piscium multitudine. Quæso te Domine, a) abi a me! nam homo nocens sum. J. Ne metue deinceps, jam homines piscaberis.

SENTENTIA.

Absque Christo piscari, hoc est, homines docere, operam ludere est. Christo auspice felix est piscatura.

P 2

SIMON.

a) Hoc est: ego nocens & indignus sum, cum qua tu innoeens & divinus versere.